

乾

隆

鄞

縣

志

鄞縣志卷十四

人物

明

傅恕字如心學通經史與同郡烏斯道鄭真皆有文名洪武二年詣闕陳治道十二策曰正朝廷重守令馭外蕃增祿秩均民田更法後黜異端易服制興學校慎選舉罷權鹽停權茶太祖嘉納之遂命修元史事竣授博野知縣後坐累死明史文苑附趙燠傳恕少日善飲及壯以三爵自限且為文以戒曰小人哉傅恕也爾負學者之名何為乎沈湎於酒顛覆厥德上有垂白之親下有孩提之子痰中乃身雖悔曷及惟於古人是效是則限以三爵罔敢少益歷觀載籍

飲酒之失君嗜之而喪邦臣耽之而溺職而今而後縱鼎
鑊在前刀鋸在側毋踰此限戒之必力庶幾不爲狂藥所
移而甘八小人之域博野兵革甫定恕爲立學官廣儲蓄
招徠離析以勞卒於官旣斂惟遺殘書數卷貧不能歸葬
百姓斂錢瘞於縣城北

曝書亭集

張文海洪武二年詔修元史徵山林遺逸之士爲纂修官

文海預焉

明史文苑傳

精於樂府李東陽嘗稱之

聞志

程徐字仲能端學子也元至正中歷官兵部尙書致仕洪
武二年偕危素等自北平至京授刑部侍郎太祖詔孔廟
春秋釋奠止行於曲阜天下可不必通祀徐上疏言古今
祀典獨社稷三皇與孔子通祀天下民非社稷三皇則無

以生非孔子之道則無以立堯舜禹湯文武周公皆聖人也然發揮三綱五常之道載之於經儀範百王師表萬世使世愈降而人極不墜者孔子力也孔子以道設教天下祀之非祀其人祀其教也今使天下之人讀其書由其教行其道而不得舉其祀非所以維人心扶世教也不聽進尙書卒徐精勤通敏工詩文

明史

鄭真字千之研窮六籍尤長於春秋元季科舉中廢乃刻意古作洪武五年中浙江鄉試第一授臨淮教諭會晉王之國道經臨淮召講春秋真開陳大義王聞之喜稱爲鄭先生秩滿入見賜宴命賦菊綻西風露脂楓葉詩稱旨陞廣信教授國子典簿裴中嘗求真作著存堂記宋濂見而

歎曰子美我名使我執筆不能過之後數年裴復請於濂
濂曰鄭先生文發明洞徹使之獨步可也自號滎陽外史
嘗採摭鄉先生言行文辭萃爲一編曰四明文獻成化兄
駒字千里洪武初爲義烏教諭弟鳳字千奇修仁縣主簿
貝瓊銘其母墓云寶生三驥亦顯於時間志

案千之跋同年錄云洪武壬子秋浙省承詔旨合
九郡之士試之得四十名壬子洪武五年也舊志
俱作四年誤今改正

汪繪世字漢文大猷五世孫洪武初署行都督府掾授太
平府同知推誠馭下吏民不忍欺嘗有三虎踞林岡白晝
攫人爲文呪之虎卽去秩滿陞湖廣按察司副使振肅憲

紀而仍濟以寬人多懷之

成化志

黃功廊洪武間署吏部掾有幹濟才本邑東津浮橋屢爲
颶風所壞積久不能繕治功廊上疏乞增設船二隻僉民
七十二戶專守又嘗以蕪州太湖多盜陳禁捕之方朝廷
咸允其議授襄陽通判政聲籍甚劾奏本郡知府貪墨改
廣東按察司經歷秩滿陞沔陽知州卒於官

成化志

周鼎字伯器洪武四年徵授萊蕪令三載課最俛預大祀
賜宴榮之尋知滁州未幾除福建行都司斷事官以事罷
再起知祿豐縣兩考致仕所至以廉勤稱

成化志

郭可學幼喪父母嚴氏守死自誓躬織紡以字孤可學早
夜淬勵從鄉先生受經專志畢力未嘗少懈事母甚謹洪

武五年中浙江鄉試授靈壁教諭善啟迪後進信義孚於人卒之日諸生弔祭無不流涕

成化志

包莘字尹耕弱冠通六經尤精於詩元至正間任定海教諭與象山教諭王厚孫張原楷皆有時名人稱四明三先生方國珍亂卽致仕入明詔求巖穴之士莘廷對忤旨謫西安府掾越二年詔諸流寓就試本道因登陝西鄉薦明年成進士授湖廣新城縣丞以註誤免

李志

林睿字思正以字行洪武六年舉茂才授鞏昌之漳縣丞蒞任後日以職業自勉秩滿報最陞知鳳翔之郿縣二十五年詔吏科集近年州縣受刑賞者分別條款名曰彰善癉惡錄勸懲天下當時得預名爲善之列者在鄆有涿州

知州史行可清源知縣陳遵道平樂縣丞劉仲欽暨思正

凡四人皆被褒嘉鄉人莫不榮之

成化志

薛敬字原禮明龜九世孫博學有重名嘗典教象山元末謝職歸以醫術自晦洪武初舉茂才以年老授吉安州龍

泉司稅未幾致仕子士廉士銘皆以學行稱孫服耕辟新

昌訓導服耘由舉人仕至趙王府紀善

成化志

王賓字用賓博學強記元末避地村曠自號水村隱者洪

武六年舉茂才以母老固辭不起母卒又以文學薦授休

寧教諭身率諸生講肄不輟秋滿考績廷試鍾山雨霽賦

及參鶴賦帝奇之命供奉翰林以老辭改教授潯陽卒

成化志

子彥修名緒以字行登永樂二年進士第授工科給事

中封事累上多所俞納奉勅撫安廣西時張輔總兵征安南徵翰調發悉資於廣右彥修督辦得濟輔嘉其能曰若斯人者當於古人中求之還朝授四川按察僉事奸豪屏跡敬歷中外餘三十年惟以廉慎自持身沒家無餘貲子

憲儋州同知

成化志

王藹字用吉工詩文能琴善寫梅竹從胡世佐受毛氏詩中洪武五年鄉試以祖老歸侍既終養再薦舉明經授太

原孟縣令

舊志孟作孟誤

廉而有為越二年入覲疏便民事歸至

宿州以疾卒

成化志

鄭本忠少篤學從舒卓受書元季方氏據浙東杜門絕仕進意益務記覽為文章洪武六年舉明經以親老不起郡

教授趙思盛薦授昌國訓導未幾縣革會稽郡延爲訓導
秩滿陞秦府保安王教授講論純正卒於官王甚傷悼遣
使致祭贈賻優渥子復言登永樂四年進士第選庶吉士
預修永樂大典應制進白鹿賦稱旨授禮部主事歷陞郎
中以太僕寺少卿致仕弟雍言永樂十三年進士亦與選
庶吉士授中書舍人仁宗監國南京累命署禮部尙寶司
及六科事或命賦詩頃刻立就帝嘉曰卿不獨文辭典雅
作字亦端楷嚴密甚類爲人復遷行人司副陞河南按察
司僉事宣宗素重其名留直文華殿備顧問特賜給事中
牙牌以便出入正統初陞太常寺少卿兄弟敦尙行義人

稱之曰二難

成化
志

單仲友名佑以字行刻意問學不拘細行洪武中與慈谿桂彥良並以明經舉入見陳治道太祖才之留侍顧問以心疾放還疾愈復召奏州名與國號同乞改之授國子助教改雲南大理府教授卒於官

李志

胡庚字文剛幼孤從胡世佐受毛詩為文冲淡醇雅洪武二十五年薦授邑庠訓導後調四川安岳教諭

聞志

崔植字斯立治春秋洪武七年薦為郡學教授調處州文學行誼卓絕流輩自號丹山樵者

李志

樓澄鑰之後與吳人梁時同受書於沙中翁又受易於魯人霸遂徙居吳尚書夏原吉治水三吳澄具言三江入海故道及所常疏濬者原吉欲薦之辭不受

李志

時銘字季昭以字行洪武二十九年以訓導徵授監察御史以疾還里復用薦授崇仁令縣治南有橋名後柞譌爲後濁及銘至守職不污人改呼爲永清焉陞四川按察司

僉事嘗夢神授以墨文思日進

成化志

姚伯良名驥以字行其先洛人大父君義知鄞遂家焉伯

良刻志於學洪武中由上舍生授郴州桂陽丞

舊志郴州作彬誤

桂陽俗靡多訟尹嘗謂伯良曰何以化之對曰吏不貪則斷

合理而民訟息不三年訟簡而俗尙敦樸帝嘉其能詔詣

京師賜楮鏹勅僉山西按察司事發奸擿伏號稱廉明年

三十八卒於官

成化志

鮑忠字克禮以明經授定海學訓導洪武九年應直言詔

疏治道十策帝嘉納擢監察御史巡按廣東平反冤獄甚多一日閱案牘畢欲起忽有白衣人訴狀迫視之不見既而一白鳥遶憲臺飛鳴數四忠疑之命左右密置筆楮於東北方坐至二鼓取之得寃狀乃爲妻謀殺者一訊卽服

人稱神明

成化志

陶虛仲名鑄以字行洪武十六年以國子生擢監察御史糾彈不避權貴劾刑部尙書開濟至死直聲動天下未幾擢福建按察使誅賊吏數十人興學勸士撫恤軍民帝下詔褒異布政使薛大方貪暴虛仲劾奏之大方辭相連并逮至京訊實坐大方罪詔虛仲還官虛仲言臣父昔爲方氏部曲以故官例徙鳳陽臣幼弱依兄撫養至於有成今

兄亦爲鳳陽軍吏臣叨聖恩備位司憲欲推祿養報生育

恩使父母兄弟得復聚處實戴聖天子孝治天下至意帝

特許迎養去徙籍廔仲清介自持祿入悉以贍賓客未幾

卒官明史本傳廔仲與薛大昉即大偕召至京民爲之詩曰陶

使再來天有眼薛公不去地無毛已而果復任明一統志

姜敬章名丙以字行洪武十四年舉明經授國子博士擢

監丞特賜勅命由是居職益勤造就士類多所成立成化志

徐仲修天賜之子與其從弟仲端自相師友講明正學以

淑後進洪武十六年辟授建陽教諭仲端應聘上吏部授

南雄府同知兄弟文學治行爲時所重成化志

黃夢麟字用澤弟夢熊字用強以孝友稱於鄉洪武十五

年夢麟舉明經爲郡庠訓導夢熊中洪武五年鄉試計偕
天官辭歸杜門力學後辟授昌國縣訓導縣革改慈谿復
調善化皆能成就後學成化志

胡敦字仲厚幼不好弄旣長潛心經史講說不倦晨夕衣
冠如對大賓雖童稚必束帶見之每芳辰高會輿唱迭和
若與世相忘旁精醫卜尤嗜寫山水人物好義輕利人多

高之

嘉靖志

傅淳字伯厚父時以道學名淳幼有成人志稍長知自奮
嘗業舉子試不利卽取所業藁焚之益究經史百家言正
以濂洛諸儒之說讀易至聖人以此洗心退藏於密拱手
起立遂顏其室爲退密鄉人以退密先生稱之問學純正

不求人知守令訪以治道必參酌古今以對至老不廢書
一夕讀周禮漏下三鼓不置侍者請閒淳曰吾樂此不知
疲也就寢而逝

嘉靖志

趙思盛字師潤博物洽聞尤邃於春秋洪武初訓導郡庠
八年遷教授生徒景從雖耆耋書不釋手子世麟官監察

御史有清白名

聞志

陳剛字子浩受春秋於林淵明初應聘爲定海訓導洪武
四年徵試吏部中選授神木知縣邑控西北邊與青海爲
隣邊寇時出沒兵燹之餘民人稀少剛撫牧凋殘民稍復
業姦胥猾吏痛以律懲之其黨謀引虜入寇剛倉卒備禦
猝遇於石山子弓手白敬臣素險黠剛嘗譴而杖之至是

與其徒劉繼宣拔刃逼令降賊剛罵曰吾恨不寸斬汝敬
臣令繼宣奪剛所佩印殺之及賊平縣治遂不復置榮陽外史

錢安字靜能洪武十七年舉文學授臨安訓導陞韓府紀

善王禮遇甚厚其子洵有才望王召見之書具慶堂三字

以賜尋致仕永樂初以太祖舊臣召至將錄用托疾力辭

賜璽書宴賚還鄉安言行謹厚記覽該博尤善吟咏聞志

毛倫字有倫洪武二十七年應薦入覲授工部員外郎以

母老乞侍養歸母歿後不復仕與鄉先生詩酒為樂自號

半村居士聞志

紀堂字宗正為文章不蹈襲而步驟起伏有古人風致洪

武間舉明經授泰州知州謫戍遼左用知者薦調知均州

永樂二年改國子學錄卒於官

成化志

葉宗可字宗可工文詞登進士署刑部侍郎以父老乞侍養既歸辟爲郡庠訓導適父因戍起解在行宗可白於當道力以身代父得免以孝行薦授國子學錄秩滿陞助教師道尊嚴剛介有守士皆敬憚之

成化志

案明時教職或用舉人或用國子生未聞以刑部侍郎家居而辟爲郡訓導者姑依前志錄之

陳與延名延以字行記覽該博而尤熟於春秋家產悉以散諸親舊之貧者朝耕暮讀雖屢空未嘗怨悔洪武二十七年薦授本縣訓導開導後學先義後利從游之士率知

敦尙古道云

志成化志

戴安仲字仲莊耿介有氣節里俗治喪多用浮屠安仲獨違衆用小宗法立祠堂以祀其先郡守王璉薦授本郡訓導秩滿入覲致仕歸自號譙國老人

志成化志

陳忠字希中一日思忠洪武末進士由翰林編修歷官太子賓客修太祖實錄爲副總裁建文四年靖難師入京坐黃子澄黨族誅今郡治前清軍館卽其故宅

聞志

徐安洪武中由人才薦歷官濟南知府後調鳳陽靖難兵由揚州往南京燕王微服從靈壁出鳳陽安諜知之拆浮橋盡斂舟楫以守燕王得一漁舟以渡及正大統放歸田里踰年詔舉遺佚復任鳳陽居數載諸戚里奏安不體朝

廷親親之義偏護小民奪還莊業上曰我昔到鳳陽安尙

拆橋況若等乎謫戍雲南遇赦歸卒於家

嘉靖志

萬鍾字榮祿定遠人父斌太祖時爲管軍副千戶從曹良臣戰阿魯渾河陷陣死鍾襲職累功遷寧波衛指揮僉事遂爲鄞人建文中從耿炳文戰大興之花園又死子武永樂六年從沐晟征交趾戰檀舍江又死弟文嗣職永樂中禦日本寇於蓮花洋獲三艦斬馘百三十有奇嘗至桃渚見海中有兩炬疑寇舟射之落其一風濤大作舟覆溺焉

蓋龍也

明史稿

袁琪字廷玉士元之子好學能詩嘗遊海外洛伽山遇異僧別古崖授以相人術先仰視皎日目盡眩布赤黑豆暗

室中辨之又懸五色縷牕外映月別其色皆無譌然後相人其法以夜中燃兩炬視人形狀氣色而參以所生年月百無一謬元時南臺大夫普化帖木兒由閩海道見琪琪曰公神氣嚴肅舉動風生大貴驗也但印堂司空有赤氣到官一百十四日當奪印然守正秉忠名垂後世願自勉普署臺事於越果爲張士誠逼取印綬抗節死見江西憲副程徐曰君帝座上黃紫再見千日內有二美除但冷笑無情非忠節相也徐於一年後拜兵部侍郎擢尙書又二年降於明嘗相陶凱曰君五岳朝揖而氣色未開五星分明而光澤未見宜藏器待時不十年以文進爲異代臣官二品其在荆揚間乎凱後爲禮部尙書湖廣行省參政其

精類如此洪武中遇姚廣孝於嵩山寺謂之曰公劉秉忠之儔也後廣孝薦於燕王召至北平王雜衛士類已者九人操弓矢飲肆中琪一見卽前跪曰殿下何輕身至此王起去召琪宮中諦視曰龍行虎步日角插天太平天子也年四十鬚過臍卽登大寶矣已見藩邸諸校卒皆許以公侯將帥王慮語洩遣之還及卽位召拜太常寺丞賜冠服鞍馬文綺寶鈔及居第帝將建東宮而意有所屬故久不決琪相仁宗曰天子也相宣宗曰萬歲天子儲位乃定琪相人卽知其心術善惡人不畏義而畏禍患往往因其不善導之於善從而改行者甚多爲人孝友端厚待族黨有恩所居鄴城西遶舍種柳自號柳莊居士永樂八年卒年

七十有六賜祭葬贈太常少卿子忠徹字靜思幼傳父術從父謁燕王宴北平諸文武使忠徹相之謂都督宋忠面方耳大身短氣浮布政使張昺面方五小行步如蛇都指揮謝貴擁腫蚤肥而氣短都督耿璈顴骨插鬢色如飛火僉都御史景清身短聲雄於法皆當刑死王大喜起兵意益決及爲帝卽召授鴻臚寺序班賜賚甚厚遷尙寶司丞已改中書舍人扈駕北巡駕旋仁宗監國爲讒言所中帝怒榜午門凡東宮所處分事悉不行太子憂懼成疾帝命蹇義金忠偕忠徹視之還奏東宮面色青藍驚憂象也收午門榜可愈帝從之太子疾果已帝嘗屏左右密問武臣朱福朱能張輔李遠柳升陳懋薛祿文臣姚廣孝夏原吉

蹇義及金忠呂震方賓吳中李慶等禍福後皆驗九載秩
滿復爲尙寶司丞進少卿禮部郎周訥自福建還言閩人
祀南唐徐知誨知誨其神最靈帝命往迎其像及廟祝以
來遂建靈濟宮於都城祀之帝每遘疾輒遣使問神廟祝
詭爲仙方以進藥性多熱服之輒痰壅氣逆多暴怒至失
音中外不敢諫忠徹一日入侍進諫曰此痰火虛逆之症
實靈濟宮符藥所致帝怒曰仙藥不服服凡藥耶忠徹叩
首哭帝怒曰忠徹哭我我遂死耶忠徹惶懼趨伏階下良
久始解帝識忠徹於藩邸故待之異於外臣忠徹亦以帝
遇已厚敢進讜言嘗諫外國取寶之非武臣宜許行服衍
聖公誥宜改賜玉軸聞者矐之宣德初覩帝容色曰七日

內宗室當有謀叛者漢王果反嘗坐事下吏罰贖正統中復坐事下吏休致二十餘年卒年八十有三

明史忠徹子應

治尙書嘗以父所纂人象大成進授鴻臚寺序班

成化志

袁珪字廷圭士元次子十八能詞翰洪武十五年禮聘至

京試治道安民論稱旨授茂名主簿均賦役平繫囚從勦

粉壁寨猺賊部運儋州軍餉皆善其職以事奪職謫戍大

寧以詩文自娛名聞燕邸召爲府紀善永樂改元官禮科

給事中有敢言聲三年出判岢嵐州七年東宮監國舊都

珪奉表入賀改浙江布政司照磨九年仍判和州後復兩

見舊都賜賚益厚以秩滿乞致仕自號清白生曾孫孟梯

舉進士官南京祠祭司主事免歸

嘉靖志

金忠少讀書善易卜兄戍通州亡忠補戍貧不能行袁珙
資之既至編卒伍賣卜北平市多中市人傳以爲神成祖
將起兵託疾召忠卜得鑄印乘軒之卦曰此象貴不可言
自是出入燕府中常以占勸舉大事燕兵起授忠王府紀
善守通州南兵數攻城不克已召置左右有疑輒問術益
驗且時進謀畫遂拜右長史贊戎務爲謀臣矣論佐命功
擢工部右侍郎贊世子守北京尋召還進兵部尙書帝起
兵時次子高煦從戰有功許以爲太子至是淇國公邱福
等勸帝立之獨忠以爲不可在帝前歷數古嫡孽事帝不
能奪密以告解縉黃淮尹昌隆縉等皆以忠言爲是於是
立世子爲皇太子而忠爲東宮輔導官以兵部尙書兼詹

事六年命兼輔皇太孫帝北征留忠與蹇義黃淮楊士奇
輔太子監國時高煦奪嫡謀愈急蜚語譖太子十二年北
征還悉徵東宮官屬下獄以忠勲舊不問而密令審察太
子事忠言無有帝怒忠免冠頓首流涕願連坐以保之以
故太子得無廢而宮僚獲全忠起卒伍至大位甚見親倚
每承顧問知無不言然慎密不洩處僚友不持兩端退恒
推讓之明年卒給驛歸葬令有司治祠墓復其家洪熙元
年追贈少師諡忠襄官其子達翰林檢討達剛直敢言仕
至長蘆都轉運使

明史本傳

金華忠之兄也負志節忠守通州有功欲推恩官之辭不
就召賜金綺亦不受成祖目爲迂叟放還一日讀宋史至

王倫附秦檜事放聲長歎而逝里中稱爲白雲先生

明史附金

忠傳

謝矩字原規與兄員皆能文員諸生旋以按察司掾謫戍臨洮及涼州矩常裹糧從後遣員家屬赴戍則矩以爲人後可免矩曰有父在非獨嫂姪也護抵蘇父卒有勸火化者不從旅殯之而與嫂姪至京師適家屬放還乃迎父櫬歸及員死復間關函骨歸撫遺孤人稱至行先生

前上者舊集

朱奇童字鄴賢永樂間以縣學生貢入太學授刑部主事

陞清州府知府操持廉介存心仁恕有古循吏風

嘉靖志

郭南字世南由邑掾起家初爲吳江典史築長橋有功遷常熟簿尋擢爲令虞山出軟粟甚美南食而甘之乃令悉

伐其樹并絕其種日後必有以是進奉害吾民者滿九載

歸

湧幢小品

陳葵字朝陽父雷有經濟才元季謫淮北成疏謁高皇帝一見奇之卽欲用爲兵部尙書廷臣言其太峻姑試以民事擢知仁和縣尋卒葵少孤卽母家以養母舅氏余伯熊有識鑒見葵勤苦憫之曰此兒當有時名乃教以儒業葵發憤自樹五軍斷事張元直薦於朝召問稱旨授惠安知縣後改單縣皆著能績永樂五年遷邳州知州民戴之若

父母

嘉靖志

楊志銘清介有守登洪武十八年進士任戶部主事以事謫戍薦知懷慶府鉏削奸豪斷理惟公郡用大治當路忌

之降建寧府同知改交趾按察司僉事未上卒

成化志

陳宗問名裕以字行通經史善書法登洪武二十四年進士歷吏部主事陞河南布政司參議廉介有爲人不敢犯巡治河道衆不勞而功成以事去職從駕北巡還授吏部考功司郎中嚴於黜陟曹局肅然出守武昌奏楚府侵占民地因而糜役石窩時有例雇車運磚贖罪武昌屬官釀錢與宗問運磚力拒之在役踰年工滿復職道出臨清而卒官考功時司務鄭誠敬憚之如嚴師後鄭爲侍郎見鄞士必問宗問子孫何如終身敬慕不忘

成化志

吳福字好德登建文二年進士授禮科給事中奉使琉球還預修永樂大典尋奉勅書撫安四川軍民夷獠向義不

遠百里懷金寶爲贊願識其風裁福拒之有立候三日不忍去者陞江西按察司僉事平反冤獄解榮等男女三百餘口遷禮部員外郎預修五經四書性理大全事竣陞陝西右參政寧夏鹽池禁嚴民有斗粟易鹽三兩者奏許民納其課鹽則官量給之民甚便焉漢中牛山逋民匿其中福遣吏作樵夫懷榜抵其巢諭以禍福渠魁皆曰吳公長者必不欺我復業者餘三千人陞福建右布政使以年耄乞歸壽七十有六初使琉球遇颶風舟人皆相視駭愕福獨神色不變惟戒嚴檣柁不爲非禮之禱既濟人問之福曰檣柁不嚴人事之失也人事苟盡命則在天夫何意衆服其識量

成化志

柴履字叔貞鄉貢授監察御史立朝正色不畏權勢巡按河南時道經通州卽發倉以賑民饑全活者萬計上怒謫令交趾尋悔召還改河南道御史卒子傑字廷俊行已端方計偕上京師適舟人夜泣欲投水死問故知爲官租所迫卽捐貲使償之明年下第歸復遇前舟人與載夜飾其妻進謝傑正色叱去之授定陶令值大水爲災民輸租不足當道謂其拙於催科遂下考以憂去後竟不起孫經別

有傳

嘉靖志

俞得儒字大雅九歲補諸生登永樂九年進士選入兵科改庶吉士授行在監察御史時西南蠻貢使至境命得儒往泄其事惟以庭實上供其珍異悉貯公帑弗獻或言貴

州藩鎮陰結蠻酋勅往按爲辨其誣誅告者十九年詔求
直言與給事中柯暹率同官歷陳六卿曠官事上命六卿
與言官辨難六卿十不得一以是爲大臣所忌出知賓州
宣德初征交趾師至浮梁江不得渡得儒建議用篾纜布
橋遂濟後論奏廣西副使李立貪暴立謫戍雲中秩滿乞
歸卒子澤天順元年進士歷官四川僉事

李志

管思易字原理永樂十三年進士授刑部主事持法平恕
奉使湖廣辨釋疑獄全活甚衆衡陽少婦秦氏孀居姑欲
嫁之不聽有隣馮小二將挑之以姑在不得問因計毒其
姑有司遂坐婦以罪思易至郡夢老婦繫二馬泣訴車前
曰馬實殺我非婦也比至有司以獄上求馬姓者不得視

隣右尺牘有馮小二日將無是乎遽呼訊之卽立承婦遂得釋歸州同知孟芳盜庫金二千許棄官去司府以中官姻不敢問乃囚吏郝洪等十數人思易知其寃上奏徑執孟芳論誅之已而居艱起復仍前職有囚王琦罪不應死尙書吳中以私憾置之大辟思易爭之不能得竟殺之憤惋感疾而卒平生勵志清約不苟得赴會試道臨清見遺錢守以待失者還之

嘉靖志

張得中字大本少從訓導王孟賓受易永樂改元徵茂才奉勅往山西教民樹藝適當大比因以所業就試明年登進士授刑部主事調工部所歷皆有能聲改江寧知縣以公平廉謹爲本民有犯罪法當流者其母訴乞留養得中

日民頑犯法固可罪也母老失養尤在所矜卒杖而遣之
禮部郎中鄒濟薦預纂修永樂大典書成還職年四十六
以疾卒性嗜書史自起家至歷官無日不在筆硯間

成化志

周翰字維翰永樂三年中浙江鄉試明年會試中副榜車
駕臨太學獻賦稱旨詔禮部所選副榜士就廷覆試擢翰
第一命進學翰林預修永樂大典七年除翰林典籍文淵
閣儲古今書籍歲久卷帙淆亂翰爲理葺逾二載完整秩
然秩滿陞檢討預修兩朝實錄翰殫心窮力書垂成而病
病旣劇猶問史成何如言不及他事而卒翰該博能文章
性和易能推所有以濟窮乏通數學於人吉凶壽夭多奇

中

楊士奇撰墓誌

周冕字汝服十三游邑庠徐和仲授之琴輒善琴比長玩
心字學梅竹山水游戲翰墨之事亦無不習一日父謂之
曰若非所謂玩物喪志者乎遂盡棄所習而務學焉永樂
六年賓興於鄉會朝廷纂修大典徵天下博學能書之士
郡博士以冕應詔太宗北征冕獻頌春宮除正字駕還京
遷右春坊司諫日侍講筵禮遇殊厚冕愈自謙抑每朝退
坐一室讀書非公事不出客至問寒暄外未嘗一語及朝
廷事因號曰訥菴年三十八被譖誅死仁宗卽位首念舊
臣遣使驛召冕長子庭授鴻臚署丞給俸讀書嘉靖志從兄
禮字吾學詩文豐腴無山林枯槁之態晚年授徒日湖之
上以講學論文爲事成化志

張伯祥原名瑞以字行少嗜學有志行中鄉舉謁選知蕪湖縣有巨商犯法夜餽千金却之曰爲吏若得人一錢卽不值一錢矣竟按其罪改知靖安作省民條約與相清淨縣中大治將入覲聞劉瑾擅權遂解組歸性孝友事父色養備至兄弟四人雖一果片脯必與同味食指約五十餘門無異烟嘗作雍睦堂里人稱雍睦張氏

甬上耆舊傳

李孝謙名本以字行與弟悌謙忠謙皆有至行其父仕開饒于貲會稽胡舜咨金華戴叔能錢唐楊彥常曹南吳主一豫章揭伯防先後游四明仕開延致賓館俾諸子問業故其詩文有法洪永間與悌謙相繼舉孝廉皆以母老固辭

明詩綜

洪武初郡國例造戰艦仕開以富室董工作以不

中程式就逮孝謙曰父老我壯宜代往悌謙曰兄素多疾且親所愛也我當往使者兩械之兄弟終不易辭孝謙至部論輸作以赦歸又一歲父復坐法當大辟忠謙荷校詣官請代官偉其氣貌許之有旨免死黥戍竟卒遼東

嘉靖志

鄭阜義字公宜永樂中領鄉薦會試中副榜例授教職辭不就特賜冠帶俾卒業太學登永樂十年進士成祖命吏部於進士中擇學行超卓者授以方面阜義得山東參政又以阜義少年宜在南方遂改廣東涖職九載政聲日起宣德改元丁外艱服闋入朝方將大用之以疾卒子自強詩文冲澹有生意官上杭訓導

成化志

李山如字伯偉永樂間以稅戶人才授鴻臚寺序班積資

至兵部郎中嘗同石亨紀功大同以忤尙書陳汝言致仕歸歷官四十餘年清苦一節非奉母不御酒肉比歸環堵數椽躬任杵臼之勞人稱擣穀郎中詔歲給月米五石及卒有司襄葬事焉子德能詩文以市鬻餬口

聞志

蔡胄字用巖永樂三年中鄉試授宜春令後改餘干愛民如子未嘗輕爲笞詈清修苦節室中琴一張書數帙而已吏部尙書郭璉巡撫江西郡言餘干知縣懦於徵科注下考當去民走百里聲胄寃且言數十年來未有廉公愛民如蔡令者尙書奉命來奈何枉我仁令言益懇切郭嘆曰吾行縣多矣未有一民頌其令廉愛者有令如此郡之言詐也更考胄績最而黜其郡貳胄蚤從學於烏斯道甫長

侍父游宦武昌楊士奇時未遇日以文學相切磨故其學

行高起於時流也

志成化

謝瑾字廷蘭少嗜學善屬對登永樂四年進士出使廣東道經庾嶺見大木委於道傍作悼木賦以見志夏原吉覽而奇之薦授刑部員外郎陞郎中持法明允遷知平陽平陽俗尚武悍瑾至戒其屬曰治民在順其恒性而已順則不擾不擾則民安由是所部帖然時朝廷遣將討虜瑾代統方面以給糧餉尋丁外艱民以借寇爲請帝可之秩滿陞廣西按察使冤獄多所平反兵民畏服瑾魁梧倜儻政聲卓異尤長於詩文

志成化

任壇字廷堅登建文二年進士授知桂東縣擢監察御史

陞江西按察僉事剛介有守守制在家三年足不出戶限
守令謁弔惟扶杖拜哭而已未嘗與之接語士論高之成化

志

臧性字孟庠父文清官績溪教諭學行高於時性早習庭
訓永樂四年以能書徵入秘閣繕寫永樂大典書成以禮
經魁京闈明年賜進士授鞏昌之成邑令以父老陳情乞
移典教鄉邑忤旨謫交趾逾七年用薦徵授監察御史改
良鄉令調宜興持守廉謹爲文章多出己思不喜蹈襲成化

志

陳本深字有源永樂初由鄉舉入國子監授刑部主事善
發奸畿內盜殺人亡匿有司繫無辜十八人於獄本深以

計獲盜十八人皆免遷員外郎受敕知吉安府吉安多豪
強奸訐訟巨猾彭搏者十九人橫閭里本深遣人與相結
爲具召與飲伏壯士後堂拉殺之皆曳其屍以出一府大
驚樂安大盜曾子良據大盤山衆萬餘本深設伏大破斬
之爲政舉大綱不屑苛細大猾旣殲府中無事晨起鼓而
升堂吏無所自輒鼓而休間有所訟呼至榻前析曲直遣
之亦不受狀有抑不伸者雖三尺童子皆得往白久之民
恥爭訟尤折節士人飾治學官奏新先儒歐陽修周必大
楊邦乂胡銓楊萬里文天祥祠廟正統六年滿九載當遷
郡人乞留詔予正三品俸解前民嫁女本深聞鼓樂聲笑
曰吾來時乳下兒也今且嫁我尙留此耶遂請老前後守

吉安十八年既去郡人肖像祀之

明史本傳

王瑩字宗器由舉人授睢寧教諭擢禮科給事中改刑科仁宗嗣位瑩上疏言吏胥托故在鄉者多病民及關隘虐累行旅非要險宜罷去皆見俞納宣德初元奉命宣撫湖貴庶人高煦反扈從車駕往征之事平詔瑩宣諭閩浙三年上憫皇城四門守兵以瑩老成命往河南山東山西北直隸衛所選強壯伍卒補之未幾敕守肇慶下車卽與民爲誓榜於門曰凡官吏貪贓害政及民之誣詞陷善者天必誅之乃蠲宿弊務更新之境內帖然秩滿增秩正三品改知西安治職如肇慶而稍濟以嚴越三年致仕壽七十卒瑩儀觀偉然言論慷慨不爲權貴少屈時陳本深守吉

安以寬和名至於剛毅不撓則有廣州守方佐實與瑩相

上下焉

成化志

案明史循吏傳瑩作瑩今從題名碑石刻

方佐字用輔永樂六年貢上春官卒業太學預修大典書
成授漳州府檢校尋改南康府其同知郭珏語人曰用輔
有剽繁治劇之才而屈在下僚乃上章薦佐於朝陞上海
知縣廉慎自持門無私謁搜剔姦蠹巨猾屏迹日詣學宮
課諸生講解經史士民翕然向風正統改元用少傅楊溥
薦超陞廣州知府拜勅而往振肅綱紀百度用貞以例入
覲遘疾卒孫誌字信之成化二十三年進士知金谿縣嚴
明果斷洞達事體刻削積弊發姦擿伏如神民爲之謠曰

除姦雄得方公民不死賴方氏擢監察御史董學南畿嚴
立法程革浮靡抑奔競陞山東參議以譖罷免金谿祀於

名宦

嘉靖志

陳恭字孟起遠之從子也舉永樂三年鄉試與修大典歷
陞工部營繕司郎中宣德時超拜大理少卿有男子嗜酒
妻苦諫不聽而男子尋醉自到有司以妻威逼論死恭廉
得其情欲原之而刑部必不可恭寢不成寐表乞去卒貸
其人轉左通政正統時進工部右侍郎遷尙書景帝時眷
注尤渥乞骸骨人以知止稱之卒賜祭葬

嘉靖志

案明史七卿表未見恭名

潘禮宣德初以後軍都事從安遠侯柳升征交阯嘗勸升

持重廣偵探引芹站寧橋事爲戒升不聽軍敗格鬪死

明史

附柳升傳

楊範字九疇踐履誠恪雖燕居必正服端坐與黃潤玉李孝謙以道誼相契有妖巫稱龍神言人禍福如響範爲文諭之不止往捽其首踏於地請不敢復犯正人衆皆驚悟散去郡守鄭珞邑令張鐸咸賓禮之以孫貴贈吏部侍郎

李志

王毓字用賢貌清而癯嘗植梅庭下雖凝陰沍寒默坐對之不去因寄之模寫以適其趣筆意勁瘦天機呈露賦詩尤工於長歌隸書亦有新意時稱三絕自號香雪坡子綱廣平令亦善寫梅

成化志

紀宗德博洽經史下筆輒成章弱冠教授里閭嚴立條約
而以身先之永樂中與修郡邑通志精敏先於諸生嘗徵
至京陛對稱旨欲授以職固辭不拜於所居東偏闢一小
齋雜植卉木日焚香宴坐陳孟顓李孝謙楊九疇王用賢
王叔禮章審言皆高士相與遊從賦詠

嘉靖志

梁輯字用光永樂二十一年舉人正統間任太平府推官
明刑釋冤擢監察御史以直言出知河南汝陽縣復補御

史以疾卒子憲讀書尙義曾孫材懷寧教諭

聞志

黃潤玉字孟清五歲侍母疾夜不就寢十歲道見遺金不
拾永樂初徙南方富民實北京潤玉請代父行官少之對
曰父去日益老兒去日益長官異其言許之十八年舉順

天鄉試授建昌府學訓導父喪除改官南昌宣德中用薦擢交趾道御史出按湖廣斥兩司以下不職者至百有二十人正統初詔推舉提學官以楊士奇薦擢廣西僉事提督學政時寇起軍興有都指揮妄掠子女萬餘人潤玉劾而歸之副使李立入民死罪至數百人亦爲辨釋南丹衛處萬山中戍卒冒瘴多死爲奏徙夷曠地母憂歸起官湖廣論罷巡撫李實親故二人實憤奏潤玉不諳刑律坐謫含山知縣以年老歸歸二十年年八十有九卒學者稱南山先生明史本傳少時有富翁僅一女招潤玉寓其家而同賈竟辭或問之曰瓜田不納履也其學以己心爲嚴師擇然後語動無所苟致仕閒居唯玩味經義所著述甚富子隆

字自立景泰中進士授南京刑部主事一夕獨坐庭中有青囊從垣入詰且持白尙書楊寧啟之有白金五錠則湖州稅長繫獄求釋者以故寧雅重之官至四川按察副使松潘軍糧仰給內地率費十致一隆議開屯田以納糧易銀軍民便之孫溥字存吾以貢授蕪湖訓導亦以文雅稱曾孫巽字啟亨由進士累遷岳州知府清宿弊革姦頑門無私謁忤當路疏乞致仕不俟報卽行父老立石識去思

云

嘉靖志

戴浩字彥廣以舉人授東昌管河通判有麥商舟覆拯其屍殯之貯遺金數百鎰於公所據引移商屬盡給之復浚臨清閘獲金玉奇貨不訾封貯縣藏尋有中貴人自言所

遺閱其數驗卽還之九載遷守雷州州故並海涵病稼乃

築堤以捍風潮民歌其功時府廳事梁產芝三莖人以爲

異改永州又改鞏昌歲饑矯發邊儲三百七十餘石賑之

監司語以法浩曰以一人命活千萬人命固將甘之乃上

疏自劾景帝優詔原焉天順改元循例致仕置義塚以葬

里之無歸者置義塾以教群姓子弟終其身不衰壽九十

三卒善吟咏詞翰戲墨多爲時所珍明史循吏傳子櫛以

貢官連城教諭歸里出入閭巷必徒步嘗被竊其僕邏得

之遽令縱遣并所竊物與之曰吾知汝貧不汝洩也嘉靖志

蔡錫字廷予中永樂二十一年鄉試入胄監仁宗朝詔擇

國子生有學行者六十人命翰林院嚴試之拔其尤者二

十人充近侍官錫與焉選授兵科給事中彈劾不避權貴
陞知泉州府廉慎勤敏剴剔宿弊興學校均徭役奏除洛
陽東山大橋三鎮戍兵公私便之時洛陽橋圯發故石有
刻文云石頭腐爛蔡公再來橋故宋太守蔡襄所建錫遂
捐俸修之橋跨海施工實難錫甚患之計無所出乃爲文
檄海神募贖批者皆莫應忽一醉卒趨踰而前曰我能往
乃飲酒大醉自沒於海若有神接之者遂得批以還上有
一酷字錫曰得非八月二十一日耶卽以是日興工潮不
至者旬日橋遂迄工更其名爲萬安云民德之立祠其旁
配享端明累陞大理寺卿奉勅巡撫湖廣大饑設法賑濟
賴全活者數萬家肖像尸祝之尋乞骸骨歸蕭然圖書不

持一物囊無買山之貲至餽粥不具逍遙吟諷宴如也

嘉靖

志

余麟字天祥舉永樂二十一年鄉試授主客司主事陞儀制郎中有言襲封孔子非嫡裔欲奪之命往勘麟曰聖人襲爵非一世嫡庶誠難辨倘勘不實將何據易之遂不果奪以憂去服闋補主客郎中河南河溢授左參政往治之至則度水勢築隄防詢民間疾苦而煦哺之陞本省左布政使時中貴執柄麟不能隨時俯仰遂乞骸骨歸子洵字允清用五品京官子充國子生舉順天鄉試授刑部主事由郎中陞福建按察副使改湖廣已而改陝西陞本省右參政轉右布政使敷歷三省大著賢聲其在荆襄時會都

御史項忠都督李震收捕山賊濫殺竹山諸縣流民就食者三千餘人又誣楊泰等十一戶爲黨俘之洵廉其狀卽引同官往爭泰等得不死忠震又欲與監軍翰林院檢討張寬發兵搜捕入山流民洵抗言流民避死入山前所殺已過當奈何又益之以要功乎衆懼乃止不捕而實大銜洵旣而忠震等俱進秩有差洵竟不叙乞致仕孫杲字懷明以貢授常州府學訓導以身率士上十事於朝不報遂

致仕

嘉靖志

王彛字友倫由賢良任左軍都督府都事宣德中改仙游令撫字有方首奏免小嶼寨土兵之役乞隣邑助楓亭驛厨傳之供計都里以均坐派條征輸以完積逋民漸復業

比三年卒於官邑人建祠祀焉

嘉靖志

張愷字德和以太學生選補江陵知縣時荆王所爲不法愷白太守密聞於朝遂廢銅王終身邑人快之大帥征交趾道江陵以令牌立取火爐及架數百愷命木工以方漆桌鋸半脚剗其中置鑊燃火又取竹束火燎數千卽收民家葦簾應之又取馬槽千餘愷使針工用棉布縫成槽綴槽口以繩用木椿張其四角以飼馬良便收卷軍中遂足用大帥嘆曰此應變才也因奏爲參謀寢不下遷工部主事周忱巡撫南畿奏愷同行松江守以美綾三百匹置舟中迎愷登舟悉以綾封庫欲劾守守肉袒謝罪乃免擢常州知府命下而卒

同上者舊傳

李衍字文盛貢入太學中順天鄉試中官王振承太后旨
選衍爲經托疾弗往授廣州府推官屢辨冤獄以撫勦反
寇有功陞刑部員外郎時石亨用事亨家人奪民產訴於
朝衍承命往勘歸田於民大忤亨意諷錦衣門達構衍重
罪謫戍宣府亨敗得復官還田里以孝友稱

嘉靖志

戎洵字君實宣德九年鄉貢授黃州府推官秉法不阿豪
強斂迹在任七年卒官貧不能具斂郡人醵金賻之

聞志

陸瑜字廷玉宣德五年進士授刑部主事陞員外郎莅事
精勤詳讞明允慮囚淮揚諸郡多所平反廬州有梓人營
巨室爲幻技置屋梁間主執訟於官坐麗魅罪瑜按其牘
謂造厭魅符書呪咀者以謀殺論豈幻技例乎乃坐匠以

他比陞郎中在部十八年無毫髮呈吏議陞山東右布政使齊魯大饑貧民相率鬩取富人粟監司坐劫罪瑜曰民饑取粟延殘喘以免道殣耳忍復殺之乎竟從輕擬已乃轉左布政使李賢嘗薦於朝天順二年刑部尙書缺屢推不獲俞旨密諭非瑜不可及陞謝帝語左右曰刑部職司民命乃今得人矣瑜爲尙書十八年明於法比習練國家典故屢辦滯獄人以不寃時錦衣指揮門達怙寵作威有衛卒誣奏指揮李斌不軌事下達鞫之達鍛鍊以逆狀具獄會廷議瑜獨明其寃達怒語侵瑜瑜曰瑜所執者祖宗之法柰何枉人至族耶達譖瑜私出反者罪上不聽止誅斌已而達尋敗言者欲置之死瑜曰達典制獄任情輕重

不爲無罪然視紀綱馬順則有間矣達卒得不死曹欽之
異謀也變起倉卒昏夜被執旣辨其爲瑜也曰是素平恕
遂釋不害時武夫有希功者執欽佃人數百輩爲逆黨瑜
曰欽謀倉卒諸佃相去或數百里安得一旦與謀乎竟得
不坐致仕歸杜門養重十有七年卒賜諡康僖

嘉靖志

陳濂字德清登正統十年進士授南京刑部主事明習文
法有鎮海戍卒誣衛指揮以下數十輩不法事同獄者又
代爲僞帖以質其姦株連逮繫乃以屬濂遂得其情法僞
帖者而釋其餘陞廣東按察副使巡視海道瀕海盜猖獗
濂輒親冒矢石出奇應變日夜露禱忽雷電交作風雨晦
冥盜迷蹟相擊殺俘馘無算陞廣東左布政使尋陞巡撫

都御史時薦歲兵興供億勞甚濂懇懇矜惻如或傷之又奉命總督漕運勤疏濬嚴監督立程度輸運無後期兩淮故南北孔道諸豪家漁獵貨貨率多橫暴凌啖庶姓悉裁以法丁內艱去適河南缺巡撫帝謂非濂不可詔起復濂灑泣就道又以漕運事重還濂原任比至淮疾作卒

嘉靖志

洪常字子經中正統十三年進士觀政兵部尙書廊廡侍郎于謙謂常有經濟才特疏授武選主事土木之變謙爲尙書時邊患孔棘奏對劾一以委常每入朝必佩筆札以從事至且語且疏卽不草立上有貴州衛指揮李貴以罪戍欲關說復官常不可反誣常索賄常不辯事竟白進員外郎郎中英廟復辟吏誣常爲謙黨詔特原之後誣常

吏以姦敗當事者聞於常常曰彼罪當則可如以常故則不可竟以他事被擒侍郎陳汝言素惡常不附已遂因都指揮李進事誣常入進賂帝亦置不問會西陲多故命兵部尙書馬昂往征之昂言部署乏人帝問洪常安在昂以憂去對詔起復之久之吏部擬陞方面昂欲薦爲本部侍郎忌者劾昂私常遂乞骸骨歸蕭然一室日以文翰自娛求者屢滿其戶讀書務核與旨爲詩冲淡典則重然諾拯人之急嘗捐俸歸僚友李鳳喪倡義葬李主事山如其高

誼類如此

嘉靖志

邵玉字德溫舉宣德十年鄉試累陞順天府學教授用尙書馬昂薦擢雲南按察僉事提督學校以足疾納祿歸其

教士先嚴義利之訓嘗三典文衡在山東宿舍逢囊金來
謁者矢天却之在山西懲前事豫作誓神詩以自見比在
江西得人尤多有市首飾者直可百金妻取而玩之輒謂
曰汝欲之乎使婦飾百金爲之夫者難乎其爲廉矣卒以
清約終身子莊舉進士仕終按察副使

嘉靖志

錢奩字文煥安之孫也舉正統元年進士授戶科給事中
陞廣西參政時義寧賊起衆議轉餉奩請給兵以銀因糧
于敵兵民稱便潯州老藍寇起以單騎諭平之士官岑豹
羅文愈以爭地訟奩宣布威德皆帖服焉尋陞湖廣左布
政使時大旱諸郡以徵楮告亟疏請止之又啟請楚藩稅
銀三千餘充運船直公私便焉丁內艱去服闋補廣西民

相慶曰不圖復見錢參政也時都御史韓雍征大藤峽會
歲祲以軍餉爲憂與措置得宜上下充給凡所俘虜尤極
詳獻得活者甚衆力請致仕以高年終子瓚字廷佑宏治
十二年進士知潛山青陽二縣皆有惠政歷官廣西副使
嘗行部至梧夜夢裂麻婦持牒哭異之時有王姓者爲兄
毆殺其妻刁氏訴姪毆而刁乃死矣翌日瓚鞠繫囚按兄
牘年六十而弟方四十謂衰老毆強壯安得遽死此必姪
毆之因悟夢中之婦乃刁也遂服其辜衆稱神明已而免
歸囊無長物自號括菴子嶧嘉靖二十三年進士嘉靖志
金湜字本清中正統六年鄉試入太學以善書授中書舍
人待詔文華殿陞太僕寺丞時監牧者多以墨敗湜日貪

泉豈能污廉士耶即日乘傳詣部釐剔宿姦圉人相顧駭

曰此鐵漢也憲宗卽位勅賜一品服使朝鮮朝鮮雅尙文

學凡中國使至必求詞翰藏之滉卽席數十篇立就選美

人入侍滉以詩却之還朝乞致仕閒居二十年惟與名勝

士結社爲樂自號朽木居士篆隸行草綽有漢晉人風度

又善寫竹人有丐者輒忻然命筆隨綴小詩其上人得其

片楮珍之滉事親以孝聞弟溥仕至池州守

嘉靖志

宗顯字必彰正統九年舉人任宜興知縣一介不取讞獄

必得情民呼爲宗青天陞大興知縣厰衛恣橫以顯清望

莫敢犯遷南京都察院經歷致仕子佑字元吉登宏治三

年進士主考徐溥拆卷見其名喜曰此吾邑清廉令宗公

之子也任刑部主事陞員外郎以詞翰名

四明文獻志

吳桓字廷用父江正統間以閩右徙實京師桓中順天鄉試選汀州府通判嘗攝守事剖決若流庭無滯訟漳州衛官以高貲凌轢儕輩至死莫敢誰何桓被檄按之置于法上杭阻山爲固溪南民多反側朝廷遣重臣巡視民訛傳勦之輒嘯聚欲亂桓單車往諭衆遂帖然改常州通判職專督賦賦戶長歲致千金名分例錢桓峻却之王俛語人曰管糧官不受分例者自洪武迄今僅兩人周同知與吳通判耳陞本府同知九年加四品俸又五年剔姦蠹均徭役導水利平賦稅修橋梁招流亡給種佃田歸者相望撫按凡七上章薦而桓以病乞骸骨進常州府致仕詔有司

禮之歸三年卒子照霍山縣知縣季子杰宿松縣學訓導

俱以淳德稱

嘉靖志

陳淳字德溫九歲能作長松賦景泰中舉於鄉知欽州莅政廉明時靈山有死獄株連數百人大暑牢戶皆滿淳止繫當罪者數人餘皆出之守大怒淳引法力爭竟不能屈義倉儲穀二萬餘石爲豪強所侵悉徵理之歲適大稔民賴以活撫按以廉州知府會薦命未下而卒弟英字廷賢舉成化八年進士知廬陵縣疏困均賦戶口繁增天旱禱雨輒應三遭鬱攸焚香告天風止火息士民以三異頌焉陞監察御史以風裁著淳子瑞字鳳儀中成化二十三年進士授中書舍人陞刑部郎中用法平恕慮囚兩廣多所

平反觸瘴暴卒人多傷之英從子玘字國祥嘉靖十一年進士歷監察御史瑞子侃字應和嘉靖五年進士授行人進刑科給事中終南京太僕寺少卿始玘與侃未第時同業郡庠以文學德行相師友比在臺諫俱以剛直名

嘉靖志

豐慶字文慶父寅初官德化縣教諭年百五歲慶以進士授兵科給事中與林聰葉盛高棟等諫景帝南坡及易儲事言甚凱切繫詔獄七年英廟復辟陞河南叅政論周府內官不法事帝嘉之陞右布政廉聲大著奉表入賀墜馬傷足乞致仕

嘉靖志

毛宏字士廣登天順元年進士六年授刑科給事中成化三年夏偕六科諸臣上言比塞上多事正陛下宵衣旰食

時乃聞退朝之暇頗事逸遊礮聲數聞于外非禁城所宜有况災變頻仍兩畿水旱川廣兵革之餘公私交困願省遊戲宴飲之娛停金豆銀豆之賞日御經筵講求正學庶幾上解天怒下慰人心帝嘉納之帝從學士商輅請改元後建言罷官者悉錄用宏請斷自踐阼而後召還給事中王徽等不許慈懿太后崩詔別葬宏偕魏元等疏諫未得請朝罷宏倡言曰此大事吾輩當以死諫請合大小臣工伏闕固爭衆許諾乃伏哭文華門竟得如禮宏在垣中所論列最多帝頗厭苦之嘗曰昨日毛宏今日毛宏前後所陳或不見聽而宏慷慨論議無所屈欽天監正谷濱受昧當除名命輸贖貶秩正一真人張元吉有罪論死詔繫獄

宏等皆固爭終不聽三遷至都給事中得疾暴卒

明史編本傳

修章懋黃仲昭檢討莊景以諫鰲山燈忤旨廷杖謫外宏

抗言三人者出自草茅初居翰苑不顧一身敢言直諫真

盛世事願乞復官修撰羅倫亦以論李賢起復被貶宏言

倫不足惜而天下將以言為諱遂得旨四人俱復原官子

驊知光山縣從子益知廣昌縣俱有惠政

嘉靖志參明史莊景傳

鄞縣志卷十四終